

## Le p'tét chreuch'fi

Les djoués d'vaint Paîtches, an ont l'aivége de faire, dains l' Jura, ç' qu' an aippele les grôs nenttayaidges.

Po l' nenttayaidge de l' aîme, les dgens péssant dains lai boête és mentes, c'ment qu' les mâcraiyaints l' diant en riaint.

Mains è y é âchi l' nenttayaidge de totes les mâjons qu' se fait d' lai tçaîve à dg'nie. Tot y pésse : an fait lai grôsse bûe, an fie les sammies pe les mait'las, an rétiure les piaintchies, l' allou, les égrès, an époussate les mûes, les piaifonds, an cile les moubyes, an bote de l' oûedre en lai tçaîve, an débairraiche le dg'nie, ...

L' môtie dait âchi être tot bé po bîn r'cidre les dgens en lai grôsse fête de Paîtches.

Ci djoué-li, l' çhèvie nenttayait lai tchaimbratte di môtie. Èl aivait eûvie lai pouêteche qu' bèyait chus l' ceim'tére po bîn oûerayie ci poiye, pe péssait in écouvèt dains tos les carres po rôtaie des fèrnieres. È y aivait ène hâte airmère laivoù qu' an chuchpend les haîyons qu' bote le tiurie po dire lai mâsse. Le hât d' l' airmère toutchait quasi l' piaifond. È n' y aivait p' prou d' piaice po péssaie l' écouvèt. L' Bregnaîd grèpoinné chus ène p'téte étchiele, pe raîché le d'tchus d' l' airmère daivô in soûetat, tiaind qu' âtche aiccretché li-d'tchus. En fregoinnaint in pô, è r'tiré in p'tét cheuch'fi qu' quéqu'un (mains tiu, craibîn in sèrvaint d' mâsse ?) aivait tçhissie dains ç'te baitch'lure. Mon Dûe, ci pouêre Bon Dûe était oûedge de craiche ! L' çhèvie déchendé d' l' étchiele pe s'boté è fri chus le p'tét creuch'fi daivô l' soûetat. È n' aivait p' ôyi qu' le tiurie airrivait en y' diaint : « Mains Bregnaîd, qu' ât-ç' te fais ? ».

È bîn vôs voites, chire tiurie, qu' réponjé l' çhèvie, ci p'tét Bon Dûe ât encoé prou djûene. Èl ât temps d' le drassie. Ç' ât po çoli qu' i l' oûeje fri, po y' aipare ç' que ç' ât qu' lai vétçhainche !

J-M. Moine